

**HEADLINES ( EVENING )**

1. Dampa Assembly bial by-election ah MNF Candidate Dr R. Lalthangliana thlan tlin a ni a, Pu Lalrintluanga hmachhawp te tih hlawhtlin a tum hmasak tur thu a sawi.
2. Lai Autonomous District Council Inthlanpui bial 25 a neih turah chuhtuma hming pelut 82 an awm.
3. Mizoram pumah 'Janjatiya Gaurav Varsh -Tribal Pride Day' vawiin khan lawm a ni.
4. Bihar Assembly inthlan vote te chhiar mek niin National Democratic Alliance (NDA) te sawrkar siam turin dinhmun tha taka an ding tawh.

<><><>

**DAMPA BY-POLL**

Dampa Assembly by-election ah MNF Candidate Dr R. Lalthangliana thlan tlin a ni.

Dampa Assembly by-election tluang taka neih zawh anih tawh hnuah tukin dar 8 atang khan vote tla chhiar tan a ni a, MNF Candidate Dr R. Lalthangliana'n vote 6981 a hmu a, ZPM Candidate Pu Vanlalsailova'n dawtin vote 6419 a hmu a, Indian National Congress Candidate Pu John Rotluangliana'n vote 2394 hmuin BJP Candidate Pu Lalhmingthanga'n vote 1541 a hmu a, PC Candidate Zahmingthanga'n vote 50 a hmu a ni.

Dampa biala thlan tlin MNF Candidate Dr R. Lalthangliana hian vote zawng zawng zinga za zela 40% a hmu a, ZPM Candidate Pu Vanlalsailova'n vote za zela 37% hmu in Congress Candidate Pu John Rotluangliana'n vote za zela 14% a hmu a, BJP Candidate Pu Lalhmingthanga'n vote za zela 9% a hmu a ni.

Dampa bial by-election hi Mizoram Politics-a By-Election inthlanah eptu party an chak wawi 3-na a ni a, kum 1983 khan Indian National Congress ticket in Phuldungsei Assembly bialah Pu Liansuama'n rorel lai PC party alo hneh tawh a, kum 2021 ah tuna Chief Minister Pu Lalduhoma'n rorellai MNF Candidate Pu Vanlalzawma chu Serchhip by-election ah a hneh ve leh a, Dampa bial by-election hi eptu party an chak wawi 3-na a ni.

Heti hian tun dinhmunah Mizoram Legislative Assembly ah rorel lai ZPM Party chuan MLA 27 an nei dawn a, MNF in MLA 10 neiin BJP in MLA 2 an nei a, Indian National Congress in MLA pakhat an nei dawn a ni.

<><><>

**DR R. LALTHANGLIANA**

Dampa bial by-election a thlan tlin Dr R. Lalthangliana'n Dampa bial hmasawn theih nan theihtawp a chhuah tur thu a sawi a, Pu Lalrintluanga Sailo in hmasawna tura hmachhawp alo neih tawh te tih hlawhtlin a tum hmasak tur ani tih a sawi.

Dr R. Lalthangliana chuan Dampa biala vote percentage sang tak chu democracy hlutna lantirtu ani tih sawiin inthlan an ngaih pawimawh avangin lawmthu a sawi a, a campaign chhungin Dampa biala khaw 30 chuang wawi 6 lai a fang chhuak a ti a, an harsatna lai leh hmasawn an ngaihna laiah khawtlang hruaitute rawnin theihtawp chhuah zui a tum thu sawiin kawng hrang hrangah hmasawn turin tan an la dawn tih a sawi bawk.

Dr R. Lalthangliana hian amah hnaih ber tu ZPM Candidate Pu Vanlalsailova aiin vote 562 in a hmu tam zawk a, Dampa bial by-election a Returning Officer Pu Malsawmzuala chuan Member of Legislative Assembly member nihna certificate a hlan nghal a ni.

*Dr R. Lalthangliana hi kum 1986-ah MNF Party zawmin party chhungah nihna hrang hrang chelhin tunah hian Sr. Vice President ni lai a ni a, Term ruk (6) zet MLA ni tawhin (Lunglei North) bial-ah a zawnin term 5 chhung MLA ah thlan tlin a ni a, Hnahthial bialah term khat tlingin Mizoram MLA zingah chatlak awm lova mahni biala tling rei ber a ni. Term 6 chhung MLA a nih lai hian Cabinet Minister term thum a chelh a, hengah hian Department hrang hrang enkawlin chak takin hna alo thawk tawh a, tunah hian Dampa bialah thlan tlin leh niin hei hi a yawi 7 MLA nihna tur a ni dawn a ni.*

<><><>

## **PARTY REACTION**

Dampa Bial By-election neih zawh takah MNF Party Candidate Dr. R. Lalthangliana thlan tlin a ni chu Party hrang hrangin an lawmpui thu an sawi.

MNF President Pu Zoramthanga chuan vawiina Mizo National Front chuan Mizo Hnam Runah Chhung Inkhawmah kum 2023 inthlana ZPM thlipui tleh thawm pawh a la reh hmaa Dampa bial by-Election ah chakna an chang chu an Party thawhhona, tanrualna leh inpekna Pathian in mal a sawm a ni a ti.

Dampa bial by-Election ah invauna, intihthaihna leh thlemna a thleng nasa tih sawiin, Chief Minister leh ZPM candidate te chu an tawng fuh hlei thei lova, Election Commission of India chuan Chief Minister hovin zilhna thu a pe hial a ni a ti. MNF te chu harsatna paltlanga huai taka pen zel tura Pathianin a chherhriamte an ni tih sawiin, Bible chang "in chhelin, in nun in chhanhim ang," tih thu vuan tlat turin a chah a, kum 2028-a Assembly inthlanpui lo awm leh turah chuan MNF tlinpui kum a thlen a rin thu a sawi bawk a ni.

Chief Minister Pu Lalduhoma chuan Dampa Bial By-election neih zawh taka thlan tlin MNF Candidate Dr.R.Lalthangliana chu a lawmpui thu leh ram tana rawng a bawlina zel turah duhsakna a hlan tih social media katlangin a sawi a, ZPM Party candidate chu tling zo lo mah se Dampa bial hmasawn nan theihtawp a chhuah zel dawn tih a sawi a ni.

ZPM Party pawhin thuchhuah siamin, Dr. R. Lalthangliana chu MLA tha tak ni tur leh Dampa bial hmasawanna tura theih tawp chhuaha thawk turin duhsakna an hlan a. ZPM chuan hnehna chang zo ta lo mah se, kum 2023 inthlanpui ai chuan an party-in hma an sawn chu lawmawm an tih thu an sawi.

BJP Mizoram state President Dr.K.Beichhua a pawhin Politics-a a senior leh politics leh administration-a experience nei tha tak, Dr.R.Lalthangliana'n Assembly session-a a telpui leh thei tur chu a lawmin, phurawm leh thlamuanthlak a tih thu a sawi a.

MPCC party President Pu Lalthanzara pawhin Dr.R.Lalthangliana chu ram tana tha taka hna a thawh theihna turin Pathianin hriselna tha a pek zel theih nan duhsakna a hlan a ni.

PC Party chuan Dampa bial by election-a thlan tlin MNF Party candidate Dr. R. Lalthangliana chu an lawmpui a, ram leh hnam tana theihtawp chhuaha hma la zui thei turin duhsakna an hlan tih thuchhuah siamin an sawi a ni.

<><><>

## **LADC CANDIDATES**

Lai Autonomous District Council Inthlanpui neihtur ah chuhtumte tana hming pek luh hun khar a ni a, hriattheih chin ah bial 25 ah chuhtuma hming pelut 82 an awm.

LADC Chief Executive Member Pu N.Zangura chu BJP atangin a bial ngai M.Kawnpui ah a ding dawn a, LADC a Chairman Pu VL Hmuaka pawh a bial ngai Lawngtlai Vengpui ah MNF Party atangin a ding dawn a, MPCC a Vice President, Lawngtlai West bialtu MLA, Pu C.Ngunlianchunga chuan Congress atangin Lawngtlai Vengpui biala dingturin hming a pelut a, Pu C.Ngunlianchunga chuan Congress an Sorkarloh apiangin LADC ah Sorkar a buai thin ni a sawiin, Vengpui bial mipui ten an koh nasat vangin MLA nichunga MDC chuh tum ta a nih thu a sawi.

LADC a CEM lo ni tawh, ZPM atanga Ticket changlo Pu V.Zirsanga chu Independent in a bial ngai Paithar ah a ding dawn a, CEM lo ni tawh tho Pu T.Zakunga pawn a bial ngai Vawmbuk bial chuh tumin hming a pelut bawk.

Hmingpelut zingah Hmeichhe awmchhun BJP, Lai District President Pi Lalhrwaitluangi Vandir chuan Chawngte 'P' bial ah chuh a tum a ni.

Inthlanna chumtuma hming pekluchte hi vawiin tlai khan endikzui niin, hmingpelut, inhnukdawk duhte tan ni 17, chhun dar 12 thleng hun hawn a ni.

Hriattheih chin ah ZPM chuan bial awm zawng zawng bial 25 an chuhkim dawn a, MNF in bial 20, Indian National Congress in bial 14, BJP in bial 13 ah Candidate an nei ang.

<><><>

### **'JANJATIYA GAURAV VARSH'**

Mizoram pumah 'Janjatiya Gaurav Varsh -Tribal Pride Day' vawiin khan lawm a ni.

India ramin zalenna a hmuh theih nana tribal hruaitu thawh hlawk tak, Bhagwan Birsa Munda pianchamphaphak wawi 150-na lawmna pui ber Raj Bhavan Circular Lawn-ah Larsap, General (Rtd) Vijay Kumar Singh hovin neih a ni a. Larsap chuan India tribal-te tana hun pawimawh tak 'Janjatiya Gaurav Varsh' puala Mizoram mipuite chibai bukin India rama chengte chu tribal kaihnawih nei vek an nih thu leh, a thenin tribal hnam ziarang leh nunphung an kalsan tawh lain a thenin an la chhawmung zel a, Mizote chu a la kalpui zelte zinga mi a ni a ti.

Tribal hnamte chu an chhehvela thil awmte nena lungrual taka chengho thiam, nakin zel thlenga khawsakna tlak ram a awm theih nana pawimawh tak an nih thu a sawi a, tribal-te hnam ziarang leh nunphung hausa tak humhalha chawilar a nih theih nan Prime Minister-in theitawp chhuaha hma a lak thu a sawi a ni.

Janjatiya Gaurav Varsh chuan mitin thinlungah tribal-te hmasawn nana bei tura inpekna thar leh hmasawna awmze nei a awm theih nana harh tharna thlen se a duh thu a sawi bawk.

'Janjatiya Gaurav Varsh -Tribal Pride Day' hi vawiin khan District hrang hrang pawh lawm a ni.

<><><>

### **AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

### **CYMA & NHIDCL**

Central YMA chuan Sairang leh Vairengte inkar kawngpui siamtu NHIDCL leh an hnuai Contractor te chu kawng siam an vil reng tur thu an hrilh.

Vawiin khan Central YMA President Pu R Lalngheta leh a thawhpui ten NHIDCL aiawh te hi Office ah leng ah sawmin an inkawm a, kawng siam mek hi December chawlhkar hmasa berah Central YMA chuan tlawh nawn leh a tum thu leh chumi hunah chuan hmalakna uluk zawk a en tum a nih thu hrilh an ni.

Inkawmhonaah hian NHIDCL Executive Director Adelbert Susngi leh a hotu dangte an tel a, Contractor te hian December 20 chho ah Kolasib leh Rengtekawn inkar chhe lai zual hi Black Topping tih hman an tum thu an sawi. Buchali leh Khamrang inkar pawh Contractor te hian December 20 chho velah black topping tih an tum thu an sawi bawk.

Vawiin vek hian Barak Valley Cement Limited (Valley Strong) hotute pawh Central YMA office-ah lengin Central YMA hruaitute te nen Mizoram a Rel a lo luh hnu ah pawh Cement man la tlawm theilo chungchang sawiho niin hemi kawngah hian hmalakna kalpui dan tur kawng ngaihtuah nise tih a ni.

<><><>

## **BIHAR**

Bihar Assembly inthlan vote te chhiar mek niin National Democratic Alliance (NDA) te sawrkar siam turin dinhmun tha taka an ding tawh. Bihar ah hian Assembly bial 243 vote chhiarah NDA te hian hma an hruaina leh hnehna an chan tawh hi seat 190 chuang a tling tawh a. Vote chhiar zawh tawhna bialah NDA hian seat 42 ah chakna an chang tawh a, seat 160 ah hma an hruai mek a. Hetihlai hain RJD kaihhruai Mahagathbandhan chuan seat 32 ah hma an hruai thung a ni. Party malin BJP 27 lain seat 65 ah hma an hruai a, JD(U) in seat 13 lain seat 69 ah hma an hruai a.,LJP in seat 2 lain seat 17 ah hma an hruai a. HAM seat 5 ah hma an hruai a, RLM seat 4 ah hma hruaiin, RJD seat 1 lain seat 25 ah hma an hruai a. Congress in seat 1 lain seat 4 ah hma an hruai a., AIMIM in seat 2 lain seat 4 ah hma an hruai a ni.

<><><>

## **BY ELECTION**

Vawiin vek khan Mizoram tiamin State pasariha Assembly seat 8 by election vote chhiar a ni bawk a. BJP leh Congress in seat 2 ve ve an la a. Jammu and Kashmir-a Nagrota Assembly seat ah BJP candidate Devyani Rana a tling a. Odisha-a Nuapada bialah BJP candidate Jay Dholkia a tlingin Jharkhand ah JMM Candidate Somesh Chandra Soren chu Ghatsila bialah thlan tlin a ni a. Telangana a Jubilee Hills ah Congress candidate Naveen Yadav V thlan tlin a ni a. Rajasthan a Anta bialah Congress candidate Pramad Jain Bhaya thlan tlin niin Punjaba ah AAP Harmeet Singh Sandhu chuan Taran Taran ah thlan tlin a ni bawk a ni.

<><><>